

每週經課朗誦經文(巴克禮台語漢字)2012/09/23

共同經課 - 1 箴言三十一章十節~三十一節

10 有才德的婦仁人是誰會尋著啊？伊的價值大大贏過寶石。11 伊的丈夫的心倚靠伊，攏無欠缺財利，12 伊一世人的日互丈夫有利益無損害。13 伊尋綿羊的毛及幼麻，甘心用手做工。14 伊親像生理船對遠遠運伊的米糧來，15 天未光伊就起來，用食物分互家內的人，將應該做的工分派女婢。16 伊斟酌看田園就買伊；用伊的手所趁的來栽種葡萄園。17 伊用氣力結腰，互手骨嚴硬。18 伊知所經營的有利益；伊的燈通暝無熄。19 伊的手提籃仔(ák-á)，伊的手心按紡車。20 伊出手賑濟艱苦人，伸手幫助喪鄉人。21 伊無因為落雪為家內的人掛慮，因為全家攏穿朱紅的衣服。22 伊為家己做媠的毯仔；伊所穿的就是幼苧布及紫色的布。23 伊的丈夫佇城門口人人識伊，因為伊及本地的長老相及坐。24 伊做幼苧布的衣裳去賣，閣將腰帶賣互生理人。25 氣力及威儀是伊的衣服；伊想著將來的景況就歡喜笑。26 伊開嘴就講智識的話；伊的舌有仁慈的教示。27 伊斟酌看家內的事，無食閒飯。28 伊的子兒起來稱伊有福氣；伊的丈夫也謳啉伊，29 講：查某子好德行者多多，獨獨你界第一的。30 好人才是虛假的，媠也是空空；獨獨敬畏耶和華的婦仁人欲得著謳啉。31 伊的手所做的效果歸伊；伊的工佇城門欲謳啉伊。

共同經課 - 2 詩篇一篇

1 無行歹人的計謀，無倚罪人的路，無坐侮慢的人的位，此號人有福氣！2 伊所歡喜的就是耶和華的律法，暝日三思的，也是伊的律法。3 伊欲親像樹栽佇溪邊，照時結果子，伊的葉也袂乾去。伊所做的一盡亨通。4 歹人毋是按呢，是親像粗糠互風吹散。5 所以，佇審判歹人倚袂住；罪人佇義人的會中亦是按呢。6 因為耶和華知義人的路；若是歹人的路會滅無。

共同經課 - 3 雅各書三章十三節~四章三節、七節~八 a 節

13 恁中間是誰有智慧見識的啊？就著用智慧的溫柔，對好的品行來顯明伊的所行。14 恁心內若因惡毒的怨妒及相爭，就莫得誇口，莫得白賊來逆真理。15 此號智慧毋是對頂面來的，是屬佇罪，屬佇血氣，屬鬼的款。16 因為佇甚麼所在有怨妒及相爭，就佇遐有擾亂及一切的歹事。17 獨獨對頂面的智慧，一是清潔，猶的是和平，溫柔好商量，有憐憫及好的果子滿滿，無偏袒，無假好。18 閣義的果子是在佇和平，給行和平的人來種。1 恁中間諸個爭戰對叨落來，諸個相爭對叨落來？豈毋是對恁的宴樂，交戰佇恁百體中的來嗎？2 恁貪戀，也無所有；恁刮人、怨妒，也袂得著。恁相爭爭戰，恁無所有，因為恁無求。3 恁求也無得著，因為濫糝求，是欲開用伊佇恁的宴樂。7 所以，恁著順服上帝。也著抵敵魔鬼，伊就走閃恁。8 親近上帝，伊就親近恁。

共同經課 - 4 馬可福音九章三十節~三十七節

30 in 對遐去，經過加利利；耶穌毋愛人知。31 因為伊教示伊的學生，給 in 講：「人子欲受解送佇人的手，人欲害死伊；害死了後，三日欲復活。」32 in 袂曉悟此個話，也毋敢問伊。33 in 來到迦百農。耶穌佇厝內問 in 講：「恁佇路裡議論甚麼？」34 學生靜靜，因為佇路裡曾爭論是誰最大。35 伊就坐啲，叫十二個學生，給 in 講：「若愛做代先的，著做眾人的路尾，也做眾人的差用。」36 閣導一個囡仔，互伊倚佇中間，續抱伊，給學生講：37 「見若為著我的名接納一個親像此號的囡仔的，就是接納我；見若接納我的，毋是接納我，就是接納差我的。」